Aca quenquitsarentsiqui avirotaque noquenquitsatacote. Ocantavetaquea te pishiyeriji yoca shirampari. Iro cantaincha aririca pishiyeri pashinipee atiri. Piquempetacari avirori, ari iquempetari aisati iriori shirampari ovaantsipaco. Tsimatsi oshequi ivanquire. Tempa aneaqueri meeca yoca shirampari itsameeti iroanequi.

Ariorica aniyero avayetari jatanaque intsompointa asheitoqui, ocantea meeca asheitoqui oshevatacotero avayetacari irosatiquea otononcantanaquearo. Avisanaje meeca avayetari asheitoqui, ari atsimiinquirori maaroni ocarati timantarori avayetari aneantarori oshintsitacaye. Tempa piquenqueshireacotanaquero avirori meeca, picanti:

—¿Paita oshintsitacanteri avayetari?

Tsamete amenero meeca jaoca ocanta oshintsitacaanteeri. Pamenero meeca oca orijanitsa ashitsajaniqui saicanteeri intsompoina asheitoqui. Jeroca ashitsajaniquipee ipajiyeetiro "Vasos Capilares". Irootaque atsimiyajayetirori avayetari. Impoiji meeca iraja irootaque aanaquerone avayetari maaroni avatsaqui.

Ocoati avatsa meeca cameetsa tampeajenca timantarori tampea. Otimatiye avetsique cameetsa avanco ocantaqueataquea onquie tampea aneencateri. Queario ocoaperota tampea quitaiteriqui aisati tsiteniripeequi ariorica amaye. Pineero ariorica amaye oshequi maantarentsiqui aitaque ampajiaquempa. Ariorica amaye apite, ari amaaque cameetsa. Cameetsa aneencatero tampea.

Ariorica atecatsite cameetsa avatsaqui, aitaque amataquero ocantaquea avetsicaje pashini avanco. Ariotaque amataquero aisati antsameetero avane, aitaque amanantaje pashini vaca, timayetanaji meeca avirapee. Pineaquero avirori meeca irootaque coaperotachari avatsa, irootaque ocoantari meeca piotacotavaquero pivatsa pineantearori pintecatsite cameetsa eiro pimantsiatitsi.

Nocoi niote meeca ¿Jaoca otimiri coaperotachari? Quempetaca piquenqueshireacotanaqueri
meeca vaca iriotaque coaperotachari, iro cantaincha,
¿Ari icoshiyeetaquempiri pivaacate? Iroosati
pishintsiti avirori ocantavetaquea eiro itimitsi
pivaacate. Ari aneerori meeca teeyaata incoaperoteaji vaca. ¿Iriompa coaperotachari pivirapee?
¿Jaoca picanteari ariorica icamaque maaroni?
Tempa oshequi avashiretanaquea.